



Inatsisartunut ilaasortaq  
Andreas Uldum  
Demokraatit

**Naqinnernik ilisarinnissinnaangitsut pillugit § 37 tunngavigalugu apeqqummut nr. 2011-9 akissut**

Asasara Andreas Uldum

Kalaallit Nunaanni inuusuttunut inersimasunullu naqinnernik ilisarinnissinnaangitsunut ilinniartitaanikkut periarfissat pillugit apeqqutinnut Naalakkersuisut qujapput.

Matumuuna Naalakkersuisut sinnerlugit apeqqutitit akissavakka.

**Apeqqut 1:**

**Naalakkersuisut qinnuigaakka nassuiaqqullugu inuusuttut inersimasullu naqinnernik ilisarinnissinnaangitsut ullumikkut qanoq ikiorneqartarnersut kiisalu allat atuarnikkut ajornartorsiutillit, taakku ajornartorsiutillit ilinniagaqalernissaminnut periarfissaqaleqqullugit.**

**Akissut:**

Atuarfik pillugu peqqussut naapertorlugu atuartitsineq assigiinngiaartinneqartussaavoq atuartup pisariaqartitaanut tunngaviinullu naapertuutilersillugu. Taamaattumik meeqqanut atuarniarnermik allanniarnermillu ajornakusoortitsisunut immikkut atuartitsisoqarlunilu allatulluunniit immikkut aaqqissuussisoqartussaavoq, taamaaliornikkut ilinniagaqarnissamut periarfissaat annertusarniarlugit.

Namminersorlutik Oqartussat ullumikkut Piareersarfinnik ingerlatsineq pillugu kiffartuunneqarnissamik ukiumoortumik kommuninik isumaqatigiissuteqartarput. Kiffartuunneqarnissamik isumaqatigiissutit taakku naapertorlugit Piareersarfiit tamarnik sullinniakkanut assigiinngitsunut immikkut neqerooruteqarnissamut periarfissaqarput, taakkununga ilanngullugit periarfissanik najukkami naliliineq aallaavigalugu naqinnernik ilisarinnissinnaangitsunut kiisalu atuarniarnermik allanniarnermillu ajornakusoortitsisunut neqerooruteqarnissamut.

Assersuutigalugu Qeqertarsuarmi Sisimiunilu atuarniarnermik allanniarnermillu ajornakusoortitsisut atuartinneqarnissamik neqeroorfigineqarsimapput iluatsilluartumik. Ullumikkulli Piareersarfinnut qinnuteqartorpassuaqartamat immikkut neqerooruteqalernissamut sulisussaqaarnissamut periarfissat killeqarput aningaasat sullissiveqarfiup pineqartup ukiumoortumik missingersuutaanit pissarsiarineqartussaammata.

21. januar 2011  
Sagsnr. 2011-044291  
Dok. Nr. 544196

Postboks 1029  
3900 Nuuk  
Tlf: +299 34 50 00  
Fax: +299 32 20 73  
Email: [kiin@nanoq.gl](mailto:kiin@nanoq.gl)  
[www.nanoq.gl](http://www.nanoq.gl)

Aamma Piareersarfiit naqinnernik ilisarinnissinnaangitsunut Danmarkimi højskolertitsinissamut killilimmik periarfissaqarput, tassani immikkuullarissakkamik atuartitsisoqarsinnaalluni.

Naalackersuisut aamma atuarnermik allannermillu ajornartorsiuteqartut ilinniagaqarnissamut periarfissaqartitaanissaat suliniutigaat. Periarfissat ilagaat Arnat Ilinniarsianni Knud Rasmussenip Højskolianut atasumi kiisalu Piniarnermut Aalisarnermullu Atuarfimmi Uummannami atuarnermik allannermillu ajornartorsiuteqaraluarluni ilinniartitaanermut peqataasinnaaneq.

### **Apeqput 2:**

**Naalackersuisut suliniutitik sunik pilersaaruteqarpat qulaani taaneqartut inuit ikiorserniarlugit?**

#### **Akissut:**

Maanna Kalaallit Nunaanni atuarniarnermik allanniarnermillu ajornakusoortitsisunut naammattumik neqerooruteqanngilaq. Ajornartorsiut Naalackersuisunit eqqumaffigineqarpoq taamaattumillu aamma assigiinngitsuni suliniuteqartoqarluni.

Maniitsumi efterskolimik nutaamik aallartitsinermut atatillugu Naalackersuisut aalajangerput atuarfimmi inissanit 60-iusunit atuartunut immikkut annertuumik atuartinneqartunut qulingiluat inissartinneqassasut. Tamatumani inuusuttunut atuarniarnermik allanniarnermillu ajornakusoortitsisut salliutinneqassapput.

Inersimasunik ilinniartitsineq pillugu nunani avannarlerni suleqatigiinnermi Nunarput inersimasunut atuarniarnermik allanniarnermillu ajornakusoortitsisunut suliniuteqarnissaq pillugu nunani avannarlermiut Nuummi ataatsimeersuartinneqarnissaannut aningaasaliisoqarnissaanik qinnuteqarlunilu aningaasaliiffigineqarsimavoq.

Ataatsimeersuarneq Kalaallit Nunaanni inersimasunut atuarniarnermik allanniarnermillu ajornakusoortitsisunut neqeroorutitik ineriartortitsinissamut aallarnisaavittut atorneqassaaq.

Nunani avannarlermiut ataatsimeersuarnerat pissaaq 22-23. marts 2011-mi.

Ataatsimeersuarnermut nangitsissutitut 24. marts 2011-mi "kalaallinut ulloqartitsisoqassaaq", tassani kalaallit ataatsimeersuarnermut peqataasut pineqartumi siunissami suliniarnissamut Naalackersuisunit kaammattuusiussallutik. Tamatuma kingorna kaammattuutit Naalackersuisunit inersimasunut atuarniarnermik allanniarnermillu ajornakusoortitsisunut suliniutitik aallartitsinissamut atorneqassapput.

**Apeqput 3: Naalackersuisut eqqarsaatiminnut ilanngunniarnerlugu, inuusuttut inersimasullu naqinnernik atuarsinnaangitsut allallu atuarnikkut ajornartorsiutillit ikiorniarlugit højskolit Piareersarfiillu pikkorissaasarnissaminnut neqeroortinneqarsinnaanerat ?**

#### **Akissut:**

Piereersarfinneersut pineqartumi misilittagaqalereersimasut nunani avannarlermiut Nuummi ataatsimeersuarnissaannut peqataaqquneqarsimapput. Ataatsimeersuarneq

pineqartumi siunissami suliniutissanik pilersaarusoqqinnissamut aallarnisaatitut  
atuutissaaq. Taamaattumik kia ilinniartitaanikkut neqerooruteqartuunissaa pillugu  
isumaliutit ilaatigut Piarersarfiit højskolellu oqaloqatiginerisigut  
aalajangiiffigineqassapput.

Aamma tassunga atatillugu inuussutissarsiortut ilinniarsiillu akornanni  
suleqatigiilluartoqalernissaanut tunngatillugu periarfissat Naalakkersuisunit  
eqqumaffigineqartorujussuupput, atuarniarnermik allanniarnermillu  
ajornakusoortitsisunut neqerooruteqartoqannginneranik ajornartorsiutit  
aaqqinneqarnissaannut taakku tamarmik soqutiginnittorujussuummata. Taamaattumik  
tamanna aamma ataatsimeersuarnermi eqqartorneqassaaq, taamatullu  
suliffeqarfinneersut tamalaat aggersarneqassallutik.

Inussiarnersumik inuulluaqqusillunga

Mimi Karlsen